

Novs documents da legitimaziun per persunas estras cun datas biometricas

■ (cc) Il svilup e la realisaziun da la cunvegna davart l'associaziun da la Svizra a la reglamentaziun da Schengen/Dublin ha ulteriuras consequenzas per la populaziun estra. A partir dals 24 da schaner 2011 vegnan fatgs novs documents da legitimaziun per persunas estras cun datas biometricas. Per ils 24 da schaner 2011 metta il cussegl federal en vigur las novas disposiziuns da la legislaziun davart las persunas estras. Necessarias èn questas midadas pervia dal svilup da la cunvegna davart l'associaziun da la Svizra a la reglamentaziun da Schengen/Dublin. Persunas che n'èn betg burgaisas d'in stadi da la UE survegnan a partir da questa data in nov document da legitimaziun per persunas estras cun datas biometricas, sch'ellas sa

trategnan pli ditg che 4 mais en Svizra e sch'ellas na pon betg sa referir a la cunvegna davart la libra circulaziun da persunas. Requiritas e requirents d'asil èn exceptads.

La vischnanca sto controllar l'identitad da la persuna. Perquai sto la dumonda vegnir inoltrada personalmain a la controlla d'abitantas e d'abitants cumpetenta. En il chantun Grischun vegnan las persunas estras alura clamadas per fixar in termin tar in center da documents d'identitad. La registraziun da las datas biometricas ha lieu en in dals centers da documents d'identitad gia existents a Cuira ed a Zernez, nua che era burgaisas svizras e burgais svizzers pon laschar registrar lur datas biometricas per il pass svizzer. La visita d'in center da documents d'identitad è uschia strin-

gentamain necessaria er per las burgaisas ed ils burgais esters da terzs stadis.

Las datas biometricas èn valaivlas per tschintg onns e vegnan arcunadas per la produziun da novs documents d'identitad. Las legitimaziuns existents da persunas estras restan valaivlas e vegnan pir remplazzadas tras in nov document da legitimaziun per persunas estras cun datas biometricas, sch'ellas scadan.

Novas taxas

Il mument che la novaziun da la cunvegna davart l'associaziun entra en vigur introducescha la confederaziun in nov model da taxas. La taxa singula per in document da legitimaziun sa cumpona d'ina taxa da permissiun, d'ina taxa d'emissiu e d'ina taxa per registrar datas biometricas.

Atras il labirint da l'atgna identitad

■ (anr) En lur emprim teater cuminaivel ICHBUERO examinechan Flurina Badel e Jürg Gautschi il jau en sias pussaivladads illimitadas. Il teater ha premiera ils 25 da schaner a Cuira en la Klibühni. Tgi na vules betg savair tge potenzial ch'el ha, tgi ch'el è propi entasum ses cor? Responder questas dumondas è ina da las competenzas centralas da la firma ICHBUERO. La firma perscrutescha identitad e producescha uschenumnadas

«Identity Keys», instruments da precisuon per l'endataziun ed il svilup da la personalitad. Quels instruments vegnan utilisads per exempel da firmas per recrutar personal, per analisas da products e martgads sco era tar seminaris per persunas privatas per optimar l'atgna personalitad.

En il ICHBUERO lavuran era Serafin Stern, in anteriur fisicher tar in institut da perscrutaziun renomà, e Cassandra, la dunna cun set fatschas. Els dus speran da la la-

Participants

concept/text/performance e gieuv: Jürg Gautschi e Flurina Badel
reschia: Stefanie Ammann
oeil extérieur: Eduard Erne
video: Flurina Badel e Beat Manetsch
tun: Jürg Gautschi
scenografia, costumes: Remo Arpagaus
masca: Renata Quinter
glish, tecnica: Nicola Vitali e Dario Marti

vur en il ICHBUERO surtut da chattar la clav tar els sez. Dus jaus che cumbattan per realisar a sai sez, che s'enlatschan en ils tis ed ils els ed ils vus, che sa perdan, stgarpitschan e crodan e stattan si puspè, fin ch'i reussescha u er betg. Quests scurdins, collisiuns, cupitgas, ma era conclusiuns e scleridas ha inscena la reschissura vallejana Stefanie Ammann. ICHBUERO è in toc multimedial. Sapietivamain vegnan maschadads elements teatralis cun elements da performance ed accziuns cun video e cun tun, per stgaffir in pendent formal a la fragilitad multifaria e nunchapibla da l'identitad.

Datas da represchentaziun a Cuira en la Klibühni ils 25, 27, 28 e 29 da schaner ed ils 2 e 3 da favrer adina a las 20.30. Ils 12 da mars a Samedan en il Kunstrum Riss ed ils 23 fin 26 da mars a Turitg en il Kellertheater 62.



L'antierur fisicher Serafin Stern vid la lavur en il ICHBUERO.

MAD


L'AURA

Plitost bischa e fraid

Situaziun generala: La notg pasada ha ina front d'aria fraida cuntanschì il territori da las Alps. Quella front procura er tar nus per temperaturas pli malempernavilas.

Oz: En il Grischun central, en il nord dal Grischun ed en Engiadina per gronda part surtratg e bischa. En las Prealps, en il nord da las Alps ferm surtratg e naiv.

Prognosa: En il nord da noss chantun, en il Grischun central, en il sid ed en Engiadina, da gievgia fin sonda plitost aura variabla, periodicamain naiv e temperaturas fin minus dus grads. En las Alps singulas scleridas.



Il Cantus Firmus Surselva che vegn dirigius da Clau Scherrer envida a quater concerts.

MAD

Truvaglias – dad ier ed oz

Concerts dil Cantus Firmus Surselva a Scuol, Domat, Trun e Sedrun

■ (cp) Il Cantus Firmus Surselva dedichescha siu niev program a grondiusas cumposiziuns dad ier ed oz, pia a veras truvaglias. Ei setracta dad ovras meins enconuscentas, denton da gronda qualitat. Gion Antoni Derungs ha cumponiu aposta per nus quater motettas da himnis latins. Duas da quellas vegnan cantadas el concert. Ulteriuras premaudiziuns ein: «Cu poss eau?» da Robert Grossmann e «Neiva, mo neiva» da Carli Scherrer. Ivo Antognini ei in giu-

ven musicist dil Tessin che ei gest sil precint da far ina gronda carriera sco cumponist da chor. Sias cumposiziuns vegnan gest engartadas da chors da renum internaziunal. Nus essan in tec loschs dad astgar cantar la premaudiziun svizra da siu «Ave Maria», ina cumposiziun che vegn – tenor nosa opiniun – ad esser renomada en la scena da chors dil futur.

Ulteriuras truvaglias el program ein da Poulenc, Lotti, Grieg e Gion Balzer Casanova. In punct culminont vegn franc

ad esser la renomada motetta da Brahms «Warum ist das Licht gegeben?».

Il dirigent Clau Scherrer e Cantus Firmus Surselva ein perschudi che mintgina da quellas canzuns ei in scazi prezius – mintgina ina truvaglia!

Ils concerts han liug sonda, ils 22-1-2011 allas 20.00 ella baselgia reformada a Scuol, dumengia, ils 23-1-2011 allas 20.00 ella baselgia parochiala da Domat, sonda, ils 29-1-2011 allas 20.00 ella baselgia parochiala a Trun e dumengia, ils 31-1-2011 allas 17.00 ella baselgia parochiala da Sedrun.

NOVITADS WWW.RTR.CH

Samedan: Local da giuventetgna

Gia questa stad pudess la vischnanca da Samedan survegnir in local da giuventetgna. La vischnanca stuess surpigliar ils custs per l'assistenz da giuvenils. Manar ed organisar il local duess alura in'uniun da geniturs. Quella sto uss chattar las localitads ed era la finanziaziun da quellas. Localitads dess quei en la chasa dals battasendas. Per pudair pajar il tschains da locaziun tschertga l'uniun sponsurs e donaturs.

Success per Würth Itensis a Cuira

La firma d'informatica Würth Itensis a Cuira ha pudì augmentar la svieuta per 12% l'onn passà. Cifras exactas n'ha il schef da la Würth Itensis betg tradì al Radio Rumantsch. A Cuira vul la Würth Itensis crear quest onn 4 novas plazzas ed investir 2,5 milliuns francs. Quella summa vegn duvrada per l'infrastructura dal center da calculaziun. 1 milliun francs dovri per segirar las datas.

OZ

DIE SÜDOSTSCHWEIZ

Davos hat die Nase voll von der Raucherei

Bündner Tagblatt

Landquart wird Nr. 1 beim Banknotenpapier

SO e BT pon ins retrair al kiosch



Klaus Schwab – il fundatur ed il parsura dal Forum economic mundial. KY

Giasts da num e da pum al FEM

La fin da quest mais vegn gliued enconuscenta da la politica e da l'economia a far part dal Forum d'economia mundial FEM a Tavau. Annunziads èn il president franzos Nicolas Sarkozy, la chanceliera tudestga Angela Merkel ed il primminister britan David Cameron. Annunzià lur preschientscha han er il minister da finanzas american Timothy Geithner ed il secretari general da

l'ONU Ban Ki Moon. Il pled d'avertura al FEM vegn tegnì dal president russ Dmitri Medvedev. Preschents a Tavau èn sper represchentsants d'economia e da la politica er exponents da la cultura e da las medias. Il FEM cuzzu tschintg dis, ha radund 2000 participants che han la schelta da frequentar radund 200 referats u discussiuns. Da gronda impurtanza èn ils contacts persunals.

Halla da glatsch Gurlaina

La finanziaziun per restaurar la halla da glatsch Gurlaina a Scuol è segirada. La halla vegn finanziaza da las vischnancas d'Engiadina Bassa da Guarda fin a Samignun. Ils custs totals per la nova plazza da glatsch muntan a var 700 000 francs. Da quels surpiglia la vischnanca da Scuol cun radund

280 000 francs la gronda cumpart, 175 000 francs vegnan da las vischnancas concessionarias da las Ovras electricas d'Engiadina, il rest surpiglian las vischnancas da Guarda, Tschlin, Ramosch fin Samignun. Las lavurs da sanaziun èn previsas a partir dals 5 da mars e vegnan terminadas sin l'atun 2011.